













LES
VISIONS
ET SONGES
DE

[l'Hermite du Mont Valerien.]

*Adressé aux bons François de ce
temps*

M D C. XXII.

Case

F

39

326

1622 ✓

THE NEWBERRY
LIBRARY

M. D. C. LXXI



LES VISIONS ET Songes de l'Hermite du Mont Valerien.

*Adressé aux bons François de
ce temps.*

ON trouuerra estrange ainsi que
ie pense & croy, de ce que i'en-
treprends de mettre au iour vne
chose qui semble friuolle & d'un stille
grosier & rustique: Mais pour parer le
coup que pourroit donner la mesdisan-
ce. Je diray que ie ne suis le premier qui
met en auant cas de peu de merite, &
que grandes causes & consequences se
peuvent manifester par de petites, ce
qui m'a fait hazarder & esperer qu'au
moins si quelques vns blasment ma pe-
tite entreprise: autres la pourront excu-

A ij

ser, l'espluchant de plus pres & considerer qu'elle n'est meue que d'une bonne volonté; A ces mots, Il faut que ie me mette aux exclamations faute d'experience. O que ne suis ie Docte, sçauant, & Erudit. O que ne suis ie expert disert & capable, & quen'ay-ie le don de Prophetie (s'il m'est permis d'ainsi parler) pour exprimer icy au vray les effects d'une vision à moy apparue, qui se peuuent vn iour manifester durant le regne de nostre sacré Roy, LOUIS DE BOURBON, surnommé le Iuste. Qui prend le cours d'estre dans peu de temps tres florissant à l'honneur de Dieu, qui le rendra autant & plus recommandable à la posterité qu'aucun autre qui ait esté, surquoy ie raciocine & pense iournellement fondé sur icelle vision, Vision non telle qu'elle: Mais vne des plus signalée & remarquable qui iamis ait esté veue, Vision prophetique qui ne peut pronostiquer autre chose que grands euénemens debvoir vn iour arriuer au contentement du Fenix de la Chrestienté, bien & vtilité de la France; laquelle

commence à estre grandement redeuable à ses desseins remplis de valeureux exploits illustres & recommandables: Mais auparauant que desduire les circonstances & dependances de ceste Vision, ie mettray en auant ce petit narré qui suit, tiré de l'antiquité, Pour faire que les rigoureux Censeurs ne s'arrestent tant à blasmer ce qu'il y trouueront ou penseront ridicule en ce petit discours; qu'à considerer & remarquer ce qui est de mysterieux & significatif en icelle Vision.

Il se lit dedans les Histoires qu'anciennement plusieurs nations pour scauoir ce qu'ils auoient à faire & à entreprendre, auoient recours aux deuinations, pronostications, & presages, qu'ils iugeoyent estre au vol de certains Oyseaux, & és entrailles de quelques Animaux qu'ils sacrifioyent à leurs Dieux, & lors qu'ils recognoissoyent par leurs obseruations leur debuoir arriuer choses bonnes ou contraires, repugnans au repos de leurs Republicques, s'adressoient aux Oracles pour en estre

plus asseurez. En pareille recommandation, auoyent ils les songes & Visions nocturnes, desquelles suiuant l'interpretation de plusieurs d'entr'eux reussissoit par fois choses ainsi qu'il auoit esté predict; A quoy ils adioustoient vne telle creance que rien de consequence n'estoit entrepris ou delaisné qu'aupreable, ils n'eussent recherché les moiens d'en estre asseurez ou diuertis. Mesmes lors que la naissance d'aucuns enfans de personnes signalées d'entr'eux arriuoit. Si aucuns songes estoient faits ou presages recogneus au vol des Oyseaux & entrailles d'Animaux sacrifiez, comme dit est, ils auoient recours aux interpretations. Ce qu'ayant esté obserué par les deux personages, dont il est faict mention en l'Histoire du petit Ioseph, tous deux seruiteurs d'un grand Prince; estans prisonniers avec ce Ioseph, il leur dit & pronostiqua par l'interpretation de leurs songes, que l'un d'eux seroit supplicié dans trois iours, & l'autre rentreroit dans pareil temps es bonnes graces de ce Prince, son Seigneur & Mai-

stre, és dignitez & charges telles qu'il auoit auparauant en sa maison, ce qui arriua ainsi qu'il leur auoit annoncé, Est il pas aussi veritable, ce qui se liét en la sainte Escriture, de la Vision de Iacob, dormant de nuit sur vne pierre. Qui a esté significatiue par l'interpretation des Saints Docteurs de l'Eglise, Que le Ciel se deuoit joindre & vnir vn iour à la terre, par le moyen de l'Incarnation du Verbe Eternel, pour le rachapt de la pauvre nature humaine. Qui est vn assureté tesmoignage qu'il ne se fait gueres de songes & ne paroist aucunes Visions qui ne denotent deuoir arriuer quelque chose de bon ou mauuais, à celuy qui les a eües, ou à autres suyuant leurs circonstances. Cet auant propos me seruira de supplément & de rempart contre la langue des mesdisans, lesquels ie supplie affectueusement de penser & repenser avec moy que rien icy bas ne se faict sans subiect & mystere: Ce faisant iugeront que ce qui suit est significatif, de quelque chose de grand à present caché, & qui se pourra manifester par le

cours de plusieurs années.

Est doncques à sçauoir que peu de temps apres le deceds du feu Roy HENRY LE GRAND que Dieu absolue, moy estant vne nuit couché en mon liét sans aucune indisposition ny inquietude ains sain & gaillard, i'aurois fait plusieurs songes en dormant à diuerses fois de la mesme nuit sans qu'à mon reueil ie me peusse resouuenir d'aucun : mais m'estant rendormy pour la deux ou troisieme fois, sur l'heure d'vne attendant deux, apres la my-nuit qui fut la derniere fois d'icelle nuit, i'aurois eu vne Vision qui auroit duré pendant ce dormir iusqu'au iour. Laquelle me faisoit voir le Ciel grandement clair & sans aucun nuage, le Soleil fort esclatant & lumineux, qui me paroissoit estre à l'endroit ou se remarque le midy, le temps estant doux, paisible, & tranquille, me semblant estre vn iour d'Esté extraordinaire pour la grande beauté & sérénité, à ce contempler, i'estois fort attentif & y prenois vn contentement que ie ne puis exprimer. Puis venant à
regarder

regarder d'un costé & d'autre ainsi qu'il me sembloit, i'aurois apperceu vn grand Lis, qui auoit son estendue depuis l'Orient iusques à l'Occident, prenant son commencement ou racine à l'endroit ou le Soleil se leue en Esté, & sa fleur qui paroissoit grandement blanche & espantoüe aboutissoit à l'endroit ou le mesme Soleil se couche, en pareille saison faisant la trauerse du Ciel, non par l'endroit ou ce Soleil prend sa carriere, ains a costé paroissant comme s'il eust esté iustement à plomb au dessus de moy, ou d'autres, qui eussent en icelle Vision en ceste ville de Paris, faisant ce me sembloit il le milieu du Ciel, au tige duquel grand Lis vis à vis le Soleil, y auoir vne grande lettre qui me sembloit auoir la forme de trois, à sçauoir d'une H. d'une E. & d'une F. à contempler laquelle lettre ayant la ressemblance de ces trois, i'estois fort attentif & arresté. & bien que ie m'efforçast à recognoistre laquelle de ces trois pouoit mieux conuenir & ressembler ceste grande lettre. Neantmoins ie trouuois qu'elle auoit la forme

*Supplément
à l'histoire
de France*

& ressemblance de toutes les trois en elle seule: Car pensant veoir vne H. s'en estoit vne, pensant veoir vne L. s'en estoit aussi vne, & pensant aussi veoir vne F. ietrouuois & recognoissois que s'en estoit vne, & toutesfois ce n'estoit qu'une lettre, au dessus de laquelle i'y voyois vne Couronne d'Or proportionnée à sa grandeur fort reluisante, & à chacun costé de ce grand Lis, i'y remarquois aussi vn autre petit Lis, les boutons desquels paroissoient auoir vn commencement de blancheur, qui prenoient leur commencement ou racine, au mesme endroict que ce grand Lis, & qui aboutissoient par leurs fleurons vis à vis ceste grande lettre couronnez comme icelle d'une Couronne d'Or chacune, aussi proportionnée à leur grandeur. Et apres auoir bien passé du temps à regarder le tout, ie me reueillis sur le point du iour que ie me trouuay en vn grand contentement & rauissement, qui m'occasionna incontinent que ie fust sur pieds & habillé, de mettre la main à la plume pour coter toutes les

circonstances que j'auois veuës de l'esprit en ceste Vision, afin qu'il ne m'en eschapast aucune chose.

Icy ie voudrois supplier les studieux, & les plus aduisez de consulter avec leurs imaginations : Si telle Vision n'a pas ou ne doit auoir de la signification plus haute que la capacité d'un esprit humain n'est grande : peut estre apres y auoir pensé plus d'une fois, soubmettront ils leurs iugemens à vne raison, pour dire avec moy qu'il ne se peut faire que de grandes choses, ne soyent cachées & occultes sous ces Lis, lettres & Couronnes Hieroglifiques, qui ne peuent auoir l'estenduë de leur signification sur autre que sur la personne de nostre Souuerain Monarque, à qui Dieu donne bonne prosperité heureuse & longue vie; en faueur duquel & pour en croissant les vœux que ie fais tous iournellement d'employer tout ce que ma petite portée peut pour son seruice, ie mettray en cet endroict trois Anagrammes, sur trois de ses noms & qualitez, sans y changer d'aucune lettre, plus ny moins

en mettre, à sçauoir sur
LOVIS DE BOVRBON, qui est le pre-
mier de sa naissance.

Le second sur LOVIS DE BOVRBON,
ROY DE FRANCE.

Et le troisieme sur LOVIS DE BOVR-
BON, ROY DE FRANCE ET
DE NAVARRE.

Vis double bon or.

De Bourbon le Roy François deu.

*R O Y de Bourbon los de ta vie en
France durera.*

En parlant du premier, qui a il icy bas
de terrestre plus precieux que l'Or pour
mon regard selon mon sens, ie diray que
ie ne trouue chose aucune qui le puisse
esgaller, à raison dequoy ceste premiere
Epitette conuient iustement à nostre
Monarque; Car il ny a Prince sur la ter-
re qui s'ose esgaller à luy pour faire com-
paraison. Et elle n'en parle pas seule-
ment simplement, ains au double pour
monstrer & signifier que non seulement
il a atteint les vingt quatre carats du bon
or: mais qu'il surpasse & va iusqu'au de-

gré de la vraye perfection , & qu'à ceste
raison il surpasse de beaucoup tous ceux
qui sont honorez de pareil tiltre & qua-
lité de Roy que luy, & qui par le progrez
de sa vie fait cognoistre que vrayement
le temps & les destinées le deuoyent
faire naistre pour le gouuernement de
cette Monarchie Françoisise ; Occasion
pourquoy peut on dire à iuste cause, que
Dieu regardant la France de son œil be-
nin , à voulu que le mesme temps luy ait
esté redeuable , & en s'aquittant de sa
debtel luya donné ce conseruateur digne
veritablement de porter en main non
vne Palme : mais vn Lis simbole de la
pureté & candeur , laquelle se remarque
en sa vie manifestement , doncques à iu-
ste raison peut on prononcer & chanter
cette seconde Epitette de *De Bourbon le*
Roy François deu , & pour la troisieme
qui ne sçait qu'elle se rapporte en tout &
par tout à la vie & mœurs de nostre
LOUIS LE IUSTE fils aîné de l'Eglise
Chrestienne & Catholique . Car quel
chemin prend il sinon celuy par lequel il
arriuera (moyennant la grace de Dieu)

à la Couronne de gloire Eternelle, & que
 par l'acheuement de ce qu'il a commen-
 cé, les vrais & bons François ne soyent
 obligez de louer à iamais ses œuvres, &
 de prier Dieu qu'il l'assiste de tout bon
 heur, pour dire à tousiours de luy ces
 mots d'Anagrames, ROY DE BOVR-
 BON, LOS DE TA VIE EN FRAN-
 CE DV RERA, Plaise à Dieu vouloir de
 telle sorte dresser ses desseins & inclina-
 tions qu'elles se puissent conformer à
 l'esperance qu'iceux bons François,
 vrais Chrestiens & Catholiques ont de
 luy afin qu'estant protegez, maintenus,
 & conseruez en bonne paix & tranquili-
 té, il y puissent à iamais benir le sacré
 nom de Dieu, comme il est & sera par ses
 Saints bien-heureux, par tous les sie-
 cles des siecles. Ainsi soit il.

Fait par moy sous l'Anagramme de mon
 nom.

CLER VIF AIGLON.

F I N.









